

# PIKININI PLEI KRUP MANUOL



Blong ol Perens o Kea Giva long ol  
Pikinini Plei Krup, Vanuatu

# PLEI, LAN, MO GRO TUGETA

## Pikinini Plei Krup Stamba Tingting:

Proverbs 22.6 “Train up a child in the way he should go and when he is old, he will not depart from it”

Mark 10: 14: “Suffer the little children to come unto me, and forbid them not, of such is the kingdom of God”

Stamba tingting i blong provaedem wan welkam, sef mo fan spes blong ol pikinini (1 – 5 yia) blong oli save ko long hem 2 taem long wan wik long 2 haoa nomo.

Fes samting mi wantem talem long everiwan se tankiu mo yumi aprisietem ol wok we Presbyterian Jyios long Vanuatu i bin statem wok ia anda long nem ia “Let’s Play” mo oli lukim gudfala rispons long ol perens mo pefomens blong ol pikinini hemi gud tumas. So yumi glad oli givim raet long yumi blong serem ol infomesen ia i go long ol narafala jioj we oli save statem plei krup blong givhan long ol pikinini raon long Vanuatu, espeseli long 0-3 yia blong oli save kam tugeta mo pleiplei tugeta. Hemi givim janis tu long ol 4-5 yia pikinini we oli no save atendem wan kindi klas.

Pikinini Plei Krup ia i open long eni pikinini blong save kam long hem long tufala dei we ol mama krup bai oli disaed long hem. Bai pikinini i mas kam wetem wan peren o keagiva we bai i stap wetem hem truaot long sesen ia.

Long everi sesen bai i kat fokas long literesi mo numeresi aktifiti we bai kam tru long ol stori, miusik o singsing, kaonting, mo mekem ol samting.

## Rejistresen

Long fes dei taem pikinini i kam bai perens i mas fulumap wan enrolmen fom.

## Wan Fi

Everi taem pikinini blong yu i kam bai hemi save karem wan smol fi (mait 100vatu, i dipen long wanem komiti blong plei krup i talem). Mane ia i blong givhan blong pem ol samting we bai pikinini i save yusum olsem ol risos.

## Samting blong kaekae

Plis taem pikinini i kam mekem sua hemi karem wan botel klin wota blong drink mo wan frut blong kaekae.

## Saen in mo Aot

Taem pikinini i kasem plei krup plis bai peren o kea giva i mas saen in mo aot from taem long wan disasta bai isi blong save hu i kam mo hu i no kam.

## Pesonol Haejin

Long fes dei taem ol pikinini i kam bai yumi tijim olgeta ol gudfala praktis olsem wasem han afta yusum tolet mo bifo kaekae mo tu blong kipim tolet i klin. Bai yumi presem mo riwodem ol gudfala fasin.

## Tolet

Yumi mas enkarejem pikinini blong yusum gud tolet. Tijim hem hao blong yusum tolet mo wasem han wetem sop stret afta hemi kamaot long tolet.

## Bilif blong Plei Krup

Plei krup ia i bilif se plei i impoten tumas long laning blong wan pikinini. Plei hemi letem pikinini blong pretend, blong eksplo mo faenemaot mo abaot wol blong hem.

Wok blong yumi i blong mekem sua se envaeromen i sef, i kat ol stret samting we bai mekem pikinini i wantem lan, envaeromen i no mekem pikinini i fraet be i save stimulatem o draevem hem blong wantem lan.

Plei krup bai provaedem ol difren aktifiti we bai stret long yia blong pikinini blong enkarejem pikinini blong developem ol skil blong hem.

Wan gudfala plei krup i sapotem mo enkarejem ol perens o ol kea giva blong wok tugeta blong serem ol infomesen mo save mo bildim wan strong rilesensip I ko long fiuja.

Long ol 2 haoa sesen ia, perens, apu o kea giva i stap wetem pikinini blong olgeta 2 taem long wan wik mo olgeta i risponsibol

blong sapotem krup lida truaot long sesen blong helpem hem long ol difren aktifiti.

## Disiplin long Pikinini

Hemi risponsibiliti blong peren o kea giva blong korektem pikinini blong hem sipos hemi mekem samting i no stret. Bai peren i mas no singaot strong o kilim pikinini long fes blong ol narafala pikinini. Toktok kwaet nomo long pikinini, blong hem i andastan mo luksave wanem bihevia i akseptebol mo wanem i no akseptebol.

## Video o Foto

Bai i no kat man i save tekem foto o video long eni wan pikinini sipos hemi no kat agrimen blong perens blong pikinini ia.

Bai kat wan rosta i stap blong hu bai helpem grup lida long ol sesen ia. Wan gud namba i blong 1 adult i lukaotem 4 pikinini.

## Ol siknes o Infeksen

Plis sipos pikinini blong yu i kasem wan siknes o infeksen we I save spred ko long ol narafala pikinini plis kipim pikinini blong yu long haos ko kasem taem hemi oraet. Tekem hemi ko long klinik o hospital sipos hemi sik tumas, olsem sipos hemi kasem sitsit wota, misel, mumps, woping kof etc

Plis letem lida long plei krup i save sipos pikinini blong yu i sik mo i no save kam long plei krup.

## Ekwil Janis

Yumi mas givim sem raet long everi pikinini nomata hemi kam long wanem aelan, hemi ko long wanem jios, hemi gel o boe, hemi kat wan disabiliti o no. Everi pikinini k kat raet blong ko long wan plei krup mo kasem semak opotiuniti blong dvelopem skil mo talen blong hem. So i minim se everi laning eksepiens i mas aksesibol long everi pikinini.

## Smok mo drink


Plis yumi no letem eni man i kam smoke o drink alkohol o kava insaed long eria blong plei krup.

## Stik Meresin mo Beth Setifiket

Plis mekem sua se pikinini blong yu i kasem everi stik meresin from taem wan siknes i kam bai pikinini blong yu i kat proteksen. Wan mo rikwaemen tu i blong perens i mas mekem everi efot blong mekem sua se pikinini i kasem wan beth setifiket bifo hemi kam rejisterem hem long plei krup.

Parens i nid blong andastan ol rol o risponsibiliti blong olgeta from se 80% blong laning blong ol pikinini i tekem ples bitwin 0-3 yia, so hemi minim se bigfala risponsibiliti i stap long han blong olgeta. Yumi nid blong wok tugeta.

## Hints blong ol Keagiva



- Samting yu save mekem tugeta:
  - Toktok (evenlong wan smol bebe)
  - Ridim buk everidei
  - Pleplei wetem bloks, bol, empty kontena, sid etc.
  - Dro (bigfala kreon)
  - Tijim niufala singsing
  - HAVE FUN...

9

TAEMTEBOL BLONG PIKININI PLEI KRUP

Ol sesen blong Pikinini Plei Krup i save difren, dipen nomo long ol interes mo nid blong wanwan komuniti. Hemia i wan gaed nomo blong soem long yu fasin blong ranem wan Plei Krup.



9.30am Setap mo welkam

10.00am Fri plei


10.20am Moning ti

10.40am Simpol aktifiti we lida I kaedem

11.00am Pakap, klinim mo putumap gud ol samting

11.15am Singsing mo stori taem

11.30am Tata! taem blong ko hom.



## Planen gud ol Aktifiti blong Plei Krup

Wanem kaen aktifiti nao bai yu provaedem mekem mekem sua se ol aktiviti I stret long yia blong pikinini?

Bai yu olsem wan lida yu mas mekem smol planing mo preparesen blong wanwan aktifiti sesen we bai yu provaedem, wanem risos bai yu nidim mo wetaem bai yu mekem ol aktifiti ia (tingabot se pikinini I lan taem hem I stap pleplei). Samtaem bai aktifiti I tekem ples long wan sesen nomo be samtaem bai aktifiti ia I hapen long everi sesen. Yu mas tingabaot tu se yu mekem aktifiti ia from wanem? Yu wantem pikinini I lanem wanem? Bai aktifiti ia I helpem pikinini o famle olsem wanem? Blong helpem yu plan from ol aktifiti ia – askem ol kwestin olsem ia:

- Ol pikinini I kat hamas ia?
- Ol pikinini I save mekem wanem finis?
- Wanem skil nao oli nid blong lanem?
- Wanem kaen aktifiti nao bai I save helpem ol pikinini blong praktisim ol skil ia?
- Ol pikinini I laekem mekem wanem kaen aktifiti?
- Wanem kaen aktifiti nao ol perens mo kea giva I laekem mekem wetem ol pikinini?

### Givim plante difren kaen aktifiti

Ol pikinini I laekem plante difren kaen aktifiti so yu olsem wan lida bai yu nidim blong redi gud long ol difren kaen aktifiti blong mekem wetem olgeta long ol difren sesen. I gud sipos yu save jenjem ol aktifiti everi wik. Tingabaot ol samting ia:

- Karem wan olfala shit bed long haos I kam mo kavremap ol jea o tebol blong mekem wan kiaman haos blong pikinini I stap ple long hem.

- Tekem sam bigfala empty bokis I kam blong pikinini I save bildimap ol samting wetem.
- Yusum ol difren samting blong pent wetem sipos I no kat bras.
- Mekem moning ti aotsaed sipos weta I gud.
- Putumaot ol difren toys olsem bloks, konstraksen toys mo gems.

Sipos I kat wan prokram blong wan wik bai i save helpem yu o ol famle blong save wanem aktifiti blong save stat plan from. Sam prokram bai yu save raetem ol toktok, sam bai yu yusum foto o pikja blong soem wanem blong mekem long wanwan plei kona.

Sipos yu nidim sam mo help yu save ko storian wetem ECCE Provinsol Kodineta long PEO Ofis o Mobael ECCE Ofisa (MEO) we hemi stap klosap long eria mo Provins blong yu.





Ol topik we bai ol perens o kea giva i tekem pat long hem wan taem long wan manis.

(Bai ol Kindy tija i save ranem ol woksop ia wetem ol perens)

**WOKSOP 1: Helti Bren**

**WOKSOP 2: Wasem Han**



**WOKSOP 3: Perens i spendem taem blong mekem ol aktifiti wetem pikinini**

**WOKSOP 4: Positiv Disiplin hemi impoten**

**WOKSOP 5: Gudfala Kaekae blong ol smol pikinini**

**WOKSOP 6: Eli Stimulesen mo fasin blong lan**

**WOKSOP 7: Fasin blong storian mo rid long ol bebe mo yang pikinini i helpem olgeta blong kasem skil blong literesi (rid mo raet)**

**WOKSOP 8: Sapotem ol pikinini we oli kat spesel abiliti**

**WOKSOP 9: Mekem pikinini i stap sef oltaem long hom.**

**WOKSOP 10: Helti Pikinini Helti Vanuatu (Flip Jat NTD)**



## Wanem nao i mekem wan gudfala ples blong pikinini i lan tru long pleplei?

Wan jeklis long aktifiti we I gud blong kat blong pikinini I save usum:

- Insaed mo aotsaed fasiliti
- Envaeromen I sef insaed mo aotsaed
- Spes we I kat fulap air mo laet I kam insaed mo tu inaf rum blong pikinini I stap muv long hem.
- I kat toelet
- Storej spes blong putum ol pleplei mo samting insaed ( olsem smol jea, tebol mat, buk mo ol pleplei)
- Fens raon long aotdoa eria blong pikinini I sef
- Eria aotsaed I kat sed
- Eria aotsaed blong pleplei ( olsem sanbis, ol swing, lo trip blong klaem, ples I kat gras blong ple gems long hem)
- Spes blong ol mama I sitdaon sipos hemi mas givim titi long bebe.





## Sam Tingting Blong Sapotem Lida Blong



### Pikinini Plei Krup

Taem yu wan lida blong Plei Krup yu save kasem satisfaksen long wok ia. Bai yu save mitim ol narafala famle mo tugeta yufala I save kam pat blong Plei Krup. Plei Krup ia I sud provaedem wan welkam, interaktif, sosel mo hapi ples we ol famle I sam kam 2 dei long wan wik. Mi hop ol tingting ia bai save givhan long yu olsem wan lida blong Pikinini Plei Krup.

#### 1) **Yu relax mo kat wan gud taem wetem ol plei krup!**

Yu no fosem yu long rol ia olsem lida, tekem taem blong enjoy taem wetem ol pikinini mo perens o keagiva.

#### 2) **Sapotem mo okenaesem ol eksperiens blong lan tru plei**

Tekem taem blong joen long ol aktifiti everi wik mo enkarejem ol narafala pikinini o famle blong joenem krup ia tu! Tingabaot sefti mo supavaesem gud ol pikinini be long sem taem givim fridom long olgeta blong pleplei, imagine mo kam krietif.

#### 3) **Krietem wan fun mo welkam envaeromen**

Hemia bai helpem setem tone mo kipim wan positif filing long plei krup ia.

#### 4) **Mitim, kritim mo talem tata long ol famile**

Mekem sua se yu welkamem ol famle mo long sem taem explenem long ol niu famle wanem I stap tekem ples long Plei Krup. Introdium ol niu famle long ol narafala we oli stap finis. Singim wan gudbai song taem yu klosem sesen blong dei mo remaendem ol blong kam bak nekis sesen.

### 5) **Planem ol sesen blong mitim nid blong ol famle**

Dipen long ej krup (yia blong ol pikinini) long plei krup blong yu, planem ol aktifiti we I stret long ej blong olgeta, no givim samting we bai oli no save mekem. Mo tu planem taem blong wanwan aktifiti from smol pikinini I no save stap kwaet long taem long wan aktifiti.

### 6) **Redi gud everiting**

Taem yu okenaes gud bai plei krup blong yu I ran smut nomo. Planem ol aktifiti bifo ol perens I stat kam mo redi long ol materiol.

### 7) **Enkarejem ol famle blong tekem pat**

Taem yu enkarejem ol famle blong helpaot long ol aktifiti long plei krup, I save mekem ol perens I save gud olgeta mo serem wok lod. Ol famle, perens, apu o kea giva I save priperem frut, helpem yu wetem ol aktifiti, setap ol pleplei o klinap. Plei krup I sud bi wan krup efot, taem everi wan I pul tugeta!



### 8) **Kipim ol samting i simpol**

No mekem sesen ia I had blong manejem. I no kat nid blong jensem ol samting ol taem. Pikinini I laekem pleplei wetem ol difren kaen gems mo toys mo bai oli no save taed blong mekem sem samting tu taem. Givim janis long olgeta blong praktisim skil mo save blong olgeta long wan aktifiti we oli mekem finis.

## 9) **Tingabaot Komunikesen**

Kipim komunikesen laen i open. Givim janis oltaem blong lida mo ol famle I stap toktok oltaem. Taem tufala pati I stap toktok bai plei krup I save wok gud.

## 10) **Mekem taem tembol I isi blong folem (fleksibol)**

Hemi impoten tumas blong kat taem blong everi samting, blong mekem sua se pikinini mo famle I ajivim wanem plei krup I plan blong ajivim. Bai ol famle I filim kamfotebol sipos oli save talem wanem bai happen long taem olsem mo tu bai plei krup I save kam sakseful taem I kat wan taemtebol. Be, lida I no mas mekem taemtebol o routine ia I strong olsem wan ston. Sipos wan ivent I hapen olsem betdei blong wan pikinini mo oli wantem mekem wan smol pati hemi oraet nomo blong save jenisim prokram blong sesen ia.

## 11) **Kivim inaf taem blong mekem krietif fri plei.**

Ol pikinini I nidim taem blong enjoy mo lan taem hemi stap pleplei. Hemi no laekem blong man I hariap long hem. Givim inaf notis long pikinini se klosap nao taem blong stopem pleplei ia from I taem blong pakap.

## 12. **Okenaesem ol spesel ivent, spesel spika, o ko sam ples.**

Maet bai yu wantem mekem wan “spesel ivent blong plei krup blong yu” blong selebretem Isa, Indipendens selebresen o Krismas”. O yu save invaetem komiuniti nes I kam. O tekem ol pikinini I ko spendem wan moning long solwota.

## 13. **Rispektem toktok ia se famle i fes eduketa o tija blong ol pikinini.**

Ol lida blong plei krup I save provaedem plante janis blong lan tru long pleplei, be yumi mas tingabaot oltaem se everi famle I difren.

#### **14. Promotem Plei Krup blong yu**

Sipos yu kat inaf rum blong sam mo pikinini kam long plei krup, yu save promotem Plei Krup blong yu. Putum posta long jioj haos o skul blong ol famle I luk.

#### **15. Kipim gud rikod blong Pikinini Plei Krup**

Kipim rikod blong atendens I ap to det mo kipim long wan sef ples.

#### **16. Aknolejem mo talem tankiu long ol perens we oli stap help**

I gud long en blong everi sesen blong lida blong tim I aknolejem ol helpa mo talem tankiu mo enkarejem olgeta blong kontinu blong help mo sapot.



# Ol kaen toys mo Ekwipmen blong Plei Krup

## Besik toys mo ol plei ekwipmen blong plei based aktifiti



- Ol difren saes bol, mo smol bat. Hemia yumi save mekem long haos nomo- rolemap niuspepa mo fulumap long soks.
- wuden bloks, blong pikinini I save bildimap samting wetem (priperem 20 bigfala pis). Yumi save kolektem o katem mo – pentem ol difren kala.



Ol sel blong difren saes, sep mo kala.

- Ol doli we yumi save wasem, ol kaliko blong kavremapdoli, ol katen mekem olsem bed blong doli.
- Ol rattle, sofosof toy mo ol stori buk.
- Pem kreon we oli big wan, glu o pen bras we yumi save mekem long lokol materiol nomo olsem frut blong pandanus o yang stik blong burao.
- Pem ol smolsmol kap, spun, plet sospen blong pikinini I save yusum long kiaman kona.



- Baket, sped, mo kontena blong digim sanbis. Kotena blong fulumap mo kapsaedem wota – yusum ol plastik we yumi save faenem olbaot (plastic blong wota, oel, jus etc).

- Wivim ol smol mat blong pikinini I save sitdaon long hem
- Kolektem ol empti katen o plastik eski bokis blong putum ol pleplei insaed.
- Bai hemi gud tumas sipos yu save pem sam smolmol jea mo tebol blong pikinini I sidaon mo wok long hem.





## Prokram blong sesen I ko gud o no?

Hemi impoten tumas long en blong dei o en blong wik blong tingabot wanem I bin tekem ples long wanwan aktifiti. Bai I save helpem yu sipos yu askem yu wan ol kwestin olsem:

- Sesen tudei I ko olsem wanem?
- Ol pikinini mo ol famle I enjoem ol aktifiti?
- Wanem I bin wok gud?
- Wanem I no bin wok gud?
- Bai yu mekem wanem nekis taem blong mekem I kam gud mo?
- Yu save yusum wan jeklis olsem hemi:-

PLEI KRUP RIVIU SESEN	Detel
Sesen I bin ko olsem wanem?	
Ol pikinini mo famle oli enjoem ol aktifiti?	
Wanem I bin wokaot gud?	
Wanem I no bin wokaot gud tumas?	
Bai nekis taem yu mekem wanem blong mekem I gud mo?	

## 10 Kwestin blong askem bifo yu ko pem ol toys o pleplei

1. Bai i strong inaf blong pikinini i yusum oltaem?
2. Hem i sef (eg; i kat ol smol pis we maet pikinini i save swalemdaon o i kat sam sap poen we i save katem pikinini?)
3. I isi blong klinim?
4. I stret long yia blong pikinini we i stap kam long plei krup blong pleplei wetem?
5. Hemi enkarejem pikinini blong save plei tugeta o blong wan pikinini nomo i yusum?
6. I kivim janis long pikinini blong developem mo praktisim ol niu skil?
7. Bai i enkarejem pikinini blong yusum tingting o imajinesen blong hem?
8. Hemi oraet long kalja blong yumi?



